

J. J.

DISPUTATIONEM

De

PROCESSV IR-
REGVLARI,

sive

TVMVLTVARIO,

à Carpzov. probato & ab Oldekop. impugnato,

CONSENSV ac AVTORITATE

Magnifici Jctorum Ordinis,

SVB PRÆSIDIO

DN. HENRICI Bindens/ Jcti,

Sereniss. Duc. Palatin. Solisbac.

& Inclutæ Reip. Noric. Consiliarii,

nec non Pand. Prof. Publ.

PATRONI sui omnis honoris cultu prosequendi,

IN ALMA NORICORVM ALTDORFINA

Die XXII. Decembr. Ann. M DC XCIV.

Eruditorum Examine & Disquisitioni

publice submittet

Responsurus

AVCTOR,

JOHANNES HVTTTERI,

Citizenf. Misn.



NEW YORK

BY DOUGLASS

RECOVERED

ST. HELENA

THE

OF THE

OF THE

THE

THE

THE

THE

THE

THE

THE

THE

THE

THE

THE

P R O O E M I V M.



*N*ulla unquam, certe hac, promeretur laudem
 Constitutio, qua optimus Imperator Constan-
 tinus M. in L. i. Cod. Theod. de Jud. Va-
 lerio Maximo, tunc temporis Praefecto Urbi,
 ut vetus notitia Praefectorum Urbi comprobatur,
 de Officio Judicis in causis cognoscendis, sequen-
 tem in modum rescripsit: Judicantem oportet cuncta rima-
 ri, & ordinem rerum plena inquisitione discutere: interro-
 gandi ac proponendi adjiciendiq; patientia praebita ab eo:
 ut ibi actio partium limitata sit, contentiones, non occurfu
 judicis, sed satietate altercantium metas compresserint, sae-
 pius requiratur, & crebra interrogatione Judicis frequen-
 tetur: Num quid novi resideat, quod annexa allegationibus
 in judiciaria conventionem conveniat; cum ad alterutrum
 hoc proficiat, sive definienda sit causa per judicem, sive ad
 nostram scientiam referenda. Nec ad nos mittatur ali-
 quid, quod plena instructione indiget. Priora hujus legis
 verba etiam Eleutherii Papae Epistolis, qui tamen centum plus
 annis Constantinum praecessisse dicitur, ut observavit Contius,
 inserta reperiuntur, unde Gratian. c. Judicantem. II. c. 30.
 qu. 5. desumpsit, totaq; hac Constitutio, quamvis à Triboniano
 in pauca contracta, nec parum immutata, repetita legitur in
 l. 9. C. Justin. de Judic. ut taceamus, quae in Capitularibus &
 alibi passim de eadem occurrunt, quae omnia summatim ostendunt,
 quod judex non, nisi ordine Juris servato, l. 4. C. de Sent. atque
 bene consideratis partium meritis, aut intercedentibus interroga-
 tionibus, nunquid partes in causa addere velint, aut possint? sen-
 tentiam ferre debeat, ut post ordinarios hujus legis Interpretes do-
 cent Gilken. Barbof. & Brunnemann. ad cit. l. 9. C. Justin.
 de Jud. praecipue vero celebratissimus Gallorum JCIus, Jacob.

Gothofred. cuius elogia latius prosequitur Anton. Marvill. in
 Praefatione de Commendat. Cod. Theod. qui tria esse dicit,
 qua integra hac Constitutione circa causas cognoscendas iudici ob-
 servanda praecepit Imperator: Primo quidem, ut cuncta ipse rime-
 tur, & ordinem rerum plena inquisitione discutiat; Secundo,
 ut partibus patientiam praebeat, interrogandi, proponendi, ad-
 jiciendive, qua ad rem controversam pertinent, quomodo & in l. 9.
 §. 2. de Offic. Procons. circa Advocatos Proconsulem patientem
 esse oportere, Ulp. pronuntiavit; Denique, tertio, ut idem saepius in-
 terroget partes, nunquid novi adjicere velint. A qua sanctione
 parum abludit peculiaris locus, qui apud Plin. l. 6. Ep. 2. occur-
 rit. Neque hoc tantum in casu sententia ferenda, sed etiam si ju-
 dex animo pendeat, ac dubitet; in relatione congrue concipienda
 observandum praecepit Imperator sacratissimus, ut Princeps suo
 postmodum rescripto causam rite decidere ac componere queat.
 Etsi enim Imperator has ipsas relationes propterea, quod prote-
 lationibus causarum, ansam dederint, exceptis quibusdam casibus,
 ut videtur Juris dubii, in l. 2. §. 21. C. de Vet. Jur. enucl. l. 2.
 de LL. & Nov. 113. c. 1., per Nov. 125. abrogaverit, ut etiam-
 num Principes praclare agant, si iudiciis praeficiant probos & do-
 ctos viros, qui ad causas decidendas ipsi idonei sunt, nec relationi-
 bus his indigent; Attamen quia non omnes omnino sustulit, atque
 Gregorius IX. Pontifex easdem iterum revocavit, cum harum
 studium Curia Romana & honestum & utile videretur, idcirco
 iudex, quoties vel relationem de causa dubia instituire, vel etiam
 ipse de negotio cognoscere vult, cuncta rimari & ordinem rerum
 plena inquisitione, vel maxime hanc ob causam, discutere tenetur, ut
 sententia secundum ea, qua ab utraque parte in rem praesentem pro-
 lata fuerunt, concipi possit, juxta monita Off. Vestr. in Roman.
 Aul. Off. sive de Process. l. 3. c. 2. n. 7. Alioquin si hoc neglectum
 fuerit, nec sententia nomen quidem promeretur, quod pronuntiatum
 est, nec ex post facto vires acquirit rei iudicata, etsi ex cognitione
 superaddita adpareat, aliter concipi nec potuisse, nec debuisse sen-
 ten-

tentiam. Scacc. de Sent. & Re Jud. gloss. 13. n. 8. *Ne ergo
ὁπποῦν πρῶτον committatur*, aut decisio cognitionem precedat,
non solum necessitas precepti, in cit. sanctione Constant. fun-
data, sed etiam ordo natura atque necessitas medii, sufficientem
causa cognitionem requirit, prout egregie deduxit consumma-
tissimus Juris Civilis ac Canonici Interpres, B. Dn. Ziegler,
in Dicast. sive de Judic. offic. concl. 27. per tot. Et licet
non diffiteamur, non nullas reperiri causas, quæ tam solidam om-
nibusq. numeris absolutam cognitionem haud exigunt, ea ta-
men ut interveniant necesse est, quæ pro qualitate causa re-
quiruntur, & ut sufficienter ejusdem veritas investigetur, indeque,
quia à nullo processu abesse queunt, ejusdem Substantialia, & de Ju-
re Natura & Gentium necessaria, à Dd. passim vocantur, præsertim
à Ferrar. in Pract. Pap. sub form. libell. act. real. verb. qua-
lis qual. petit. num. 1. Hillig. ad Donell. l. 23. c. 1. lit. D.
Brunnem. in Proc. Civ. c. 1. n. 18. aliq. pluribus. Sed contra
hac omnia quam maxime peccare videtur tumultuarius causas
tractandi modus, atq. irregularis processus, quem non raro ju-
dicis inepti protrudit inscitia. Attamen cum nihilominus Ger-
manorum ac præcipue Saxoniorum Jctorum Papinianus, B. Carp-
zov. in Proc. tit. 1. art. 6. divisionem Judicii in Regulare &
Irregulare agnoscat, adeoq. Processum irregularem sive tu-
multuarium suo modo admittat & probet, ejusq. vestigia sequatur
Nicol. in Proc. p. 1. c. 1. n. 15. quibus Just. Oldekop. in Quæst.
ad Process. crim. dec. 4. q. fin. & dec. 5. q. 1. gravissime con-
tradicit; Ea propter haud inutile forsitan erit, Speciminis Aca-
demici loco, in hunc articulum controversum paulo penitius in-
quirere, atq. ita expendere, num ejusmodi irregularis Processus
admittendus sit, nec ne? Ne vero labor hic in confusionis incidat vi-
rium, ante omnia nonnulla generaliora ad originem & divisionem
Processus spectantia præmittenda, postea vero his ipsis, quæ de hoc
Processu irregulari ejusq. Justitia hinc inde inveniuntur, subji-
cienda erunt. DEVS annuat conatibus & cœpta secundet!

SECTIO I.

De Origine ac Generalioribus ad Processum ejusq; Divisiones spectantibus.

S Y M M A R I A.

Cognitio Processus à Judicii notitia commodè separari nequit, quia arctissime coherent, hinc §. 1. Homonymiam & Definitionem Judicii exhibet, cujus natura & Instantia latius exponitur in §. 2. Ordo Judicii vocatur Processus §. 3. qui tamen ab ipso Judicio differt §. 4. Processus unde originem suam trahat, an ex Jure Divino aut Naturali disquiritur in §. 5. Postea subjicitur, qualis procedendi modus obtineat in Statu Naturali §. 6. Ex quo substantialia cujusvis Processus deducuntur §. 7. Que in quovis Statu semper sunt observanda §. 8. Sed leges populorum positivæ, etiam Divinæ, hunc modo specialia circa Processum adjecerunt, quod apparet ex Processu veter. Germanorum, & ex traditis Judæorum §. 9. ex Jure Romanorum §. 10. ac Canonico, quo auctus fuit, & duplex introductus Processus §. 11. Moderatus Recess. & Ordin. Camer. Imperii, deniq; & stylo Curie cujusvis loci §. 12. Hinc postea varii Judiciorum & Processus oriuntur divisiones, §. 13. quæ explicantur in §. 14. Supperadditur modus cognoscendi in causis quibudam summaris in §. 15. & fit transgressio ad Sect. seqq. in §. 16.

§. 1.

Quoniam Judicium cum Processu tanto nexu junctum est, ut neutrum ab altero separari queat; Ideo melioris declarationis gratia pauca de illis præmittenda esse censemus, ita tamen, ut varias Judicii acceptiones non repetamus, cum per se notæ & sint, & jam dudum prolixius eas explicaverint DD. interq; illos Azo in *Summ. Cod. de Jud. n. 2. Marant. in Spec. aur. p. 1. Vultej. de Jud. l. 1. c. 1. n. 26. atq; Rittersb. ad Nov. p. 9. c. 3. qui significationes. 23. verbi judicii & judicare num. 1. refert, posteaq; has ipsas significat. ex *Accurs. ad f. 4. Inst. quibus non est permitt. fac. testam.* tribus versibus comprehensas repetit. Sufficiat hac vice, Judicium, dictum quasi jus dicitum, à jure scil. dicendo, (cui opponitur justitium, quod vacationes Judiciorum constituit) hoc loco nihil aliud esse, quam legitimam rei controversæ inter litigantes apud Judicem tractationem, eum in finem institutam, ut ipsius sententia lis finiatur, arg. c. *form. 10. de V. S. vid. Duaren. in pr. comm. de Jud. Vult. l. 2. Jurisprud. c. 1. n. 1. aliq; plures.**

§. 2. Hæc ipsa vero tractatio judicialis hodie præcipue non uno aut altero actu absolvitur, sed, tanquam totum, ut plurimum in duas partes integrales primæ & secundæ Instantiæ dividitur, quanquam hæc posterior accidentaliter solum sit, & non semper occurrat,

currat, vel quia quis non vult appellare, l. 4. §. 1. *Et seqq. de Appell.* vel quia non potest, per tot. tit. *Cod. quor. appell. non recip.* vid. *Wesensb. ad Tit. Cod. de Jud.* Instantia quid sit, late disputat *Asin. in Prax. Flor. ad rubric. §. 1. cap. 1. cum seqq.* Nobis hac vice sufficiat, quod per instantiam intelligamus litis motæ exercitium, ut loquitur *Umm. Diss. ad Proc. 7. num. 25.* vel, ut ait *Vult. de Jud. l. 1. c. 12.* exercitium iudicii, & quidem totius usque ad sententiam, quod cum vi veritatis apertæ viderint Pragmatici, nec tamen vim Processus penetraverint, excogitarunt duplicem Instantiam, citationis scil. & Iudicii, quarum priorem vocarunt prosecutionem causæ à citatione ad lit. contestationem, posteriorem à lit. contest. usque ad sententiam, cui in causis civilibus triennium, in criminalibus vero biennium præscriptum reperitur in l. 13. *C. de Jud. Rittersb. ad Nov. p. 9. c. 3. n. 32.* sed invita non solum Jurisprudentia Romana, verum etiam Praxi, ut solide deducit *Dn. Schilt. Ex. ad Pand. 13. th. 3. §. 4.* Nam usu fori etiam in primo statim termino, si emanat actor, reus ab instantia absolvitur, etsi lit. contestatio nondum intercefferit. Vid. *Carpz. p. 1. c. 2. def. 9.* Primæ Instantiæ usitata distributione iterum tres constituuntur partes: Prima, media, & postrema, quarum prior continet actus, qui L. contest. præcedunt; altera, quæ eam comitantur, & sequuntur usq; ad sententiam; tertia vero est priorum consequens à sententia usq; ad executionem. Vid. *Jason. ad Autb. ad bac. C. de Jud. num. 2.* nec non *Wesensb. cit. loc.* quæ omnia satis demonstrant, iudicium infinitis fere constare actibus, adeoq; à *Dn. Schilt. cit. Ex. 13.* non incongrue vocari Ens aliquod collectivum, vel aggregatum, ut Dialectici loquuntur, sive potius actum quendam complexum forensem, quo iudex actoris petitionem, & rei ad eam responsionem, contradictionem exceptionesq; recipit, cognoscit atque decedit.

§. 3. Ordo porro horum actuum non in nuda libidine actoris, rei aut Iudicis consistit, sed certam à jure præscriptam habet normam, qua non servata id, quod geritur, nullum esse dicitur in l. 4. *Cod. de Sent. Et interloc.* vid. post alios *Vant. de Nullit. ex defectu Processus.* Atque hic ordo duplex esse statuitur, (1) substantialis, quo omisso vitiatur iudicium, & (2) non substantialis sive accidentalis, quo deficiente nihilominus sustinetur, *Petr. Gregor. Tholos. l. 48. Synt. c. 1. num. 3. Hillig. ad Donell. l. 23. c. 1. lit. a.* aliàsque Processus nomen promeruit. Sicut enim, ut reliquas vulgares hujus verbi

verbi praterreamus significationes, processus inter alia augmentum aliquod denotat; Ita etiam juridice per Processum augentur actus judiciales, atq; progrediuntur usque ad sententiam & executionem: quamvis nonnunquam etiam citationes, mandata, & alia Judicium decreta Processus nomine veniant, juxta *Ord. Camer. p. 3. tit. 12. §. 2. in verb.* Und endlich was die Ladung/Mandata, und andere Process anbetrifft.

§. 4. Differt ergo Processus, in hac nostra juridica eaque latiori significatione, pro ordine tractandi sumptus, à Judicio, tanquam modus à re ipsa. Processus siquidem ordinem & modum præscribit, quâ ratione lis in judicio à partibus ventilanda & à judice decidenda sit; Judicium vero est Ens illud collectivum, quod modum hunc complectitur: Utriusq; deniq; objectum est res inter partes litigantes controversa, hæc quippe, sive causa in judicium deducta, materiam Judicii constituit, ut fusius demonstrant *Vult. de Jud. l. 1. c. 1. n. 15. Schilt. Ex. 13. tb. 5. Dn. Stryck. Introd. ad Prax. for. c. 1. §. 5.* Estq; Processus in hac significatione ordo legitimus causas in judicio proponendi, ventilandi, ac dijudicandi. Variant quidem Interpretes circa genus hujus definitionis, dum alii modum ac formam, alii rationem, alii ordinem judicii, alii ordinem & modum &c. esse censent, prout videre est ex *Carpz. Proc. tit. 1. art. 1. Brunn. de Proc. Civ. c. 1. Schilt. cit. Ex. 13. atq; Fibig. in Proc. c. 1. §. 2. qui solum Job. Emer. à Rosbach. inter eos, quos de Processibus vidit, Scriptores, suæ Prax. Civil. sive Traß. de Proc. Judiciar. definitionem inseruisse credit; Reipsa tamen omnes conveniunt, quod facile demonstrari posset, si instituti nostri id pateretur ratio. Confer. quæ de definitione Processus proponit *Albus. L. 3. Dicaol. cap. 24. in pr.**

§. 5. Atque hujus Processus originem tam alte repetunt Interpretes, ut eam Juris quoque Naturalis ac Divini, imo ab ipso Deo in Paradiso contra transgressores Protoplastos observatum esse asserant, quos inter referendi *Marant. in Spec. p. 3. num. 132. seqq. Rosb. in Proc. t. 1. n. 32. Durand. in Specul. procem. n. 24. Termin. in Epist. nuncup. ad Proc. Carpz. cit. art. 1. n. 24. & alii, quæ ratio est, quod Oßav. Vestr. d. l. 3. c. 2. n. 7. citationem, tanquam initium Processus, Juris Divini esse credat, commotus exemplo, quod ipse Deus Adamum ante latam sententiam in jus vocarit, quæ assertio tamen *Ulm. Disp. ad Proc. 1. tb. 1.* haud verisimilis esse videtur, & quidem propterea, quod Jure Naturæ omnia communia, & demum ex Jure*

Jure Gentium dominia distincta fuerint, per l. 1. D. de J. & J. adeoq; ex hac hypothesi judicium, saltem quo de ulla re, sive respectu dominii, sive alterius alicujus juris ageretur, esse non potuerit. Sed in hujus sententiæ veritatem ut inquiramus, brevitatis ratio, quæ constringimur, non permittit. Multa tamen egregia ad doctrinam de communione primæva spectantia vid. apud *Pufendorf.* & præcipue apud *Dn. Thomam. lib. 2. Inst. Jurispr. Div. c. 9.*

§. 6. Interim quoad originem Processus in confesso esse censemus, quod & Naturali rationi & Legi conveniens sit, ut neq; contra inauditum aut indefensum Processus instituitur, neq; sine causæ cognitione sufficienti componatur, idque exemplo suo egregie comprobavit Creator clementissimus, qui protoplastos inauditos à Paradiso expellere noluit, hocque respectu verissimum est, quod tradit *Donell. l. 23. Comm. c. 1.* ordinem Processus non tam arbitrio Legislatorum, quam certo Naturæ Jure constare. Ut tamen naturalis hæc cognoscendi ratio hoc vel illo ordine peragatur, aut ad certam dirigatur normam, lege Naturæ unquam præscriptum esse, non putamus, cum ne quidem inter eos, qui in Statu naturali vivunt, judex detur, qui pro imperio lites exortas componat, sed potius Jus Naturæ exigat ac postulet, ut homines, quæ sibi invicem debent, ultro præstent & exhibeant, sicque damnorum restitutionem sponte offerant, ceu deducit *Pufendorf. de J. N. & G. l. 5. c. 13. §. 1. & 2.* Hoc tantum Juri Naturæ ac æquitati conveniens est, ut quis id, quod ex suo judicio justum esse statuit, si lædens spontanea restitutione conato principio haud satisfaciat, non statim armis asserat, & controversiarum suarum arbitrum bellum & Martem constituat, sed molliora potius in hoc statu tentet ac eligat media, qualia sequentia tria esse perhibentur, ut (1) per amicabile colloquium, vel inter ipsos litigantes, vel etiam inter eorum mandatarios controversia componatur. *Grot. de J. B. & P. l. 2. c. 23. §. 7.* aut ut (2) sors adhibeatur, sicubi vel natura negotii, vel etiam partium conditio permittit, sorte liti finem imponere. *Grot. cit. loc. §. 9.* ac si nec hoc modo controversia exitum suum sortiatur, tandem (3) compromisso causa finiatur, ac, electis utrinq; arbitris, eorum cognitioni res relinquitur, sicque omnibus modis caveatur, ne in bellum prorumpant lites, de quibus modis uberius conferri merentur post *Grot. Kulpis. in Colleg. Grot. ad dict. l. 2. c. 23. Pufendorf. l. 5. c. 13. §. 3. & alii,*

§. 7. Modum autem & processum disceptationes & controversias has coram arbitris instituendi, ipsam rationem communem, juxta cujusque negotii indolem, satis superq; indicare, asserit *Pufend. l. 5. c. 13. §. 8.* qui propterea superfluum esse credit, multis præscribere, quomodo partes intentionem suam proponere, aut statum controversiæ formare, aut quomodo, perpensis utriusq; partis argumentis, arbitri electi sententiam ferre debeant. Ubi tamen intentio alterius ratione alia probari nequit, quam per instrumenta, eaque amissa fuerint, arbitris hic nihil amplius superesse dicit, quam ut uni partium, cum consensu alterius, juramentum deferant, sicut & hoc partium arbitrio relictum esse censet, num tali in casu fortis aleam causæ judicem constituere, aut, quod huic affine est, certamen singulare adhibere velint, cujus usus hæc in re passim, etiam in judiciis Germanorum, quondam receptus fuit, ut testantur *Pufend. l. 5. c. 13. §. 8. Grot. d. c. 23. §. 10. ibiq; Kulpis. atque Limn. in Addit. ad lib. 5. Jur. Publ. c. 7. n. 10.* qui inter causas Judicii Provincialis Burgraviatus Norici expresse refert *die Kampff, Rechte, Sachen* / earumque processum per Ordinationem *des Kampff, Gerichts* declarat.

§. 8. Ex quibus jam liquet, omnem omnino Statum hominum, etiam naturalis libertatis, in controversiis dijudicandis necessariam ac sufficientem supponere causæ cognitionem, siquidem & arbitri ab illis dati, qui ob Superioris defectum nullum civile agnoscunt imperium, in dubio ita electi præsumuntur, ut, æque ac judices, momenta & merita causæ expendant, atque circa quæstiones facti in nudis & injuratis partium assertionibus æquales se præbeant, adeoq; contradictoria asserentibus non credant, sed potius ad signa, rationes & incorrupta instrumenta respiciant, aut his deficientibus effata testium adhibeant, atque secundum ea sententiam concipiant. Hinc *Phil. Jud. de Decal.* quoties, inquit, desunt argumenta & probationes, quæ ex scripto fiunt, ad testes recidit controversia. Vid. de hoc procedendi modo uberius *Pufend. cit. l. 5. c. 13. per tot.* præcipue vero *§. 5. 8. Et seqq. usq; ad fin.* ubi insimul circa executionem rei judicatæ monet, quod in statu naturali, quoties ab altero non expletur ultro, quod debetur, sibi quisque suis sociorumq; viribus & armis executionem peragere possit, quæ, quousque licita ac permissa sit, illa, quæ rerum Moralium Scriptores ad bellum justum necessaria esse dicunt, affatim comprobant, de quibus præ cæteris *Textor. in Synop. J. G. c. 16. 17.* videri poterit. Hæc q; ipsa jam satis

abundē; indicant, quid statuendum sit de illis actibus, qui DD. substantialia Processus etiam de Jure Naturali & Gentium constituere dicuntur, de quibus, præter Auctores jam antea in Procemio adductos, videri possunt *Zang. de Except. p. 1. c. 2. n. 9. Carpz. in Proc. tit. 1. art. 1. n. 14. Damboud. in Prax. Civil. c. 21. n. 3. atq. Dn. Stryck. in in Introd. ad Prax. For. c. 1. §. 14.*, quod scil. ex his illi ipsi, qui ad defensionem rei & legitimam causæ cognitionem pro qualitate negotii necessarii sunt, sine vitio nunquam abesse possint, bene tamen reliqui, qui ultra eos, ex hypothese Juris positivi & Canonici ad substantialia etiam Processus summarii requiruntur. In his namque substantialibus Juris positivi, non in illis, quæ Juris Naturæ sunt, obtinere dicitur illud, quod Princeps ordinem judiciorum haud servare teneatur. Vid. post *Lanc. Contr. in Templ. omn. Judic. l. 1. c. 1. §. 3. Hillig. ad Donell. l. 23. c. 1. lit. D.*

§. 9. Substantialibus his in Statu civili, pro diversarum Rerum publicarum conditione, modo pauca, modo plura circa judiciorum ordinem superaddita esse cernimus. Et quidem, ut aliorum populorum hac in re prætereamus instituta, pauca adjecta illis fuisse in veteri compendioso judiciorum Germanicorum processu, variis egregiis exemplis ostendit *Lehmann. in Chron. Spirens. l. 4. c. 21.* ubi inter alia in vers. In berührten Fällen &c. sequentia proponit verba: Was den Proceß in Rechts-Sachen anlanget/ so ist aus denen Protocollen/ so fast vor 200. Jahren beschrieben/ zu vermercken/ daß vor Alters ein kurzer Proceß in allen Bürgerlichen Srrungen gehalten/ und schwere Sachen in 2. oder 3. Gerichts-Tagen aufs längste erledigt werden. Et paulo post: Daß die Partheyen nur mündlich/ und gar nicht in Schrifften/ ihre Sachen entweder selbst/ oder durch eines Raths-Verordneten/ und beendigten Fürsprechen/nach gestalten Sachen/ entweder vor Gericht oder für Rath vorgetragen/ der Kläger seine Klage kurz/ ohne Weitläufigkeit/ doch zur Nothdurfft anbracht/ der Beklagte darauf seine Einrede sürgewandt/ der Kläger hinwieder repliciret/ und der Beklagte dupliciret/ darneben jeden Theil sein Verweiss mit lebendiger Kundschaft/ oder in Schrifften darthun. Quid de Jure Divino forensi Deus populo Judaico circa judicia eorumque processum speciatim observandum præceperit, passim ex Sacris literis, præcipue è libris Mosaicis liquet, quamvis id variis Hebræorum additionibus multis modis auctum videamus, quæ ratio est, quod *Selden. de J. N. & G. juxt. disciplin. Hebræor.*

l. 4. c. 4. § seqq. plura hanc in rem , & quidem de judiciis Hebræorum ordinariis & extraordinariis accumulet, quem vide.

§. 10. Quod vero concernit Jus Rom. diffitendum haud est, quod substantialibus illis plura & innumera fere adjecerit. Utut enim, ob deficientem plenariam Processus civilis historiam, ejusdem exacta destituamur descriptione , asserti tamen nostri veritatem abunde docent varia, quæ non solum in legibus, sed etiam apud Ciceronem, Gellium, Comicos aliosque bonæ notæ Autores extant fragmenta, utut imperfecta, ex quibus aliqualis hujus processus forma patet, quam maxime vero, quod nonnulla peracta fuerint in Jure, sive apud Magistratum, nonnulla vero in Judicio, sive coram Judice pedaneo. In jure fieri dicebantur: In jus vocatio, libelli editio, satisfactio, Advocati postulatio, judicis & exceptionis impetratio, nam non tantum actionis, sed & exceptionis formula concedenda erat à Prætorè, per l. 1. §. 6. ff. *Ne quid in sum. publ.* Brissón. *de form. l. 5.* posteaque sequebantur replicationes & duplicationes, sive ultteriores defensiones. Vid. *Cicer. de Orat.* ubi hunc processum Juris Rom. adumbrat, quem locum, cum parum sit cognitus, illustrat *Dn. Schilt. Ex. 7. tb. 3. in med.* Reliqua vero post Lit. Contest. usque ad sententiam dicebantur fieri in judicio, quæ ratio procedendi obtinuit usque ad tempora Justiniani, quibus quidem varia circa morem dandi Judices pedaneos contigit mutatio. Vid. *Nov. 82. pr.* Ipsa tamen ratio judicum pedaneorum nondum plane abolita fuit, ut vel ex levi *Digestor. Cod. § Novell.* inspectione constat. Tandem postquam Magistratus ipsi judicare cœperunt, differentia inter jus & judicium, ut & inter Magistratum & Judicem desit, teste *Schilt. Ex. 7. tb. 3.* atque omnia judicia extraordinaria facta sunt, juxta §. ult. *Inst. de Interd.* ut ita in pluribus longe alia penes Nos instituendi & peragendi judicia invaluerit ratio, quam quæ apud priscos Romanos obtinuit, cujus pleniori descriptione quidem per antea dicta destituimur, brevem tamen proponit exegesis *Vultej. l. 5. disc. 1. § 2. Jurispr. 27.* paulo latiore *Revard. lib. Protrib.* exactiorem autem descriptionem *Pollet. l. 5. Hist. For. Rom. qui l. 4. c. 11.* melius agi cum LL. scribit, si veterem procedendi consuetudinem retineamus, cum in hodiernum processum varii, quod dicere fas sit, irrepperint abusus, (quos merito *Vent. de Valent. in Partb. litig.* passim, cum primis l. 16. c. 15. perstringit,) adeoque non amplius verum sit, quod in dict. §. fin. *Inst. de Interd.* dici-

dicitur: Judicia omnia esse extraordinaria, sed potius: Ea ob prolixiorē procedendi modum & immortalitatem litium esse fere perpetua.

§. 11. Scilicet, postquam ex parvis initiis invaluerunt Judicia Ecclesiastica, atque ab Imperatoribus Christianis approbata & aucta fuerunt, ut latius deduxit DN. PRÆSES in *Dissert. de Jure Episcop. c. 11.* in iisdem, æque ac in aliis judiciis, tempore quoque Justiniani Imper. processus, à Jure Civili aliàs præscriptus, per *Nov. 79. c. 1.* obtinuit; Sed accedentibus his judiciis Ecclesiasticis, variis illisq; singularibus incrementis, per quæ non tantum transcendentia facta, sed seculari etiam potestati plane subtrahenda fuerunt, ut ortum hunc & incrementa horum Judiciorum DN. PRÆSES in *cit. c. 11. à n. 1. usq; ad n. 29.* ostendit, singularis quoque variis Decretalibus Pontificum præscribi & ordinari cœpit Processus, qui non tantum in judiciis Ecclesiasticis receptus, sed & ad imitationem ipsius Juris Canonici, quod in multis articulis, ob sanctitatem quam præ se ferre videtur, Juri Justin. palmam præripuit, ac in German. maxime quoad processum prævaluit, ad judicia secularia translatus, tandemq; ita auctus & prolixior redditus est, ut in Ens quoddam, ex multis & infinitis actibus forensibus collectum & aggregatum, excreverit. Hoc cum sequentes Pontifices animadverterent, & viderent, prolixiorē hunc procedendi modum omnibus omnino non congruere causis, maxime illis, qui singularem promereri videntur favorem, expeditiorē & celeriorē procedendi modum reducerunt, ex certis, quæ vocant, substantialibus Processus constantem, quem oppositive ad priorem vocarunt *summarium*, huncque *Clem. V. in adduct. c. Saep. 2. de V.S.* ita determinavit, ut, sola facti veritate inspecta, procedatur, & non nisi necessariæ probationes & defensiones legitimæ admittantur, hacque dispositione *Jur. Canon.* distinctio in processum *ordinarium* & *summarium*, hodiernum usitatissima, ut mox aparebit, introducta est.

§. 12. Præterea in *Ordinationibus Camera*, inprimis ea, quæ Anno 1555. promulgata reperitur, aliisq; Imper. *Recess.* præcipue in novissimo *Imp. Recess. de An. 1654.* forma procedendi plenius descripta ac determinata fuit. Judiciorum tandem speciales Ordinationes cum Observantia, multa subinde adjecerunt, & hæ primas in formando processu constituunt partes, ut in vulgatum abierit dictærium: Nosse stylum Curia valere pluris, quam totam scientiam juris, teste

Dn. Stryk. in Introd. ad Prax. Forens. c. 1. n. 17. Stylo hoc Curiae deficiente, forma procedendi in *Recess. Imper.* nec non in *Jure Can. lib. 2. Decretal.* proposita (cum pauca, quae sunt Juris Civ. quoad formalia judicii in foro obtineant) spectanda, ac, pro diversitate causarum in judicium deductarum, diversa quoque ratio procedendi observanda erit.

§. 13. Sic itaque variis judiciorum divisionibus, juxta quas vel (1) interiora, vel exteriora, hæcque porro vel (2) Ecclesiastica vel secularia, vel (3) simplicia vel duplicia, vel (4) universalia ac generalia vel singularia, vel (5) petitoria vel possessoria, vel (6) criminalia vel civilia, vel (7) principalia vel præparatoria esse dicuntur, de quibus vid. Interpretes, interque eos *Vult. de Jud. l. 1. c. 2. Rosb. in Proc. t. 1. n. 4. & seq. Rittersbus. ad Nov. p. 9. c. 3. num. 4. & seq. atq; Marant. qui in Spec. suo viginti duas refert & explicat, a diverso hoc procedendi modo superaddi cœpit divisio in ordinaria & summaria, quæ posteriora quoque à DD. alio sensu, ac in §. *fin. Inst. de Interd.* vocantur extraordinaria, vocabulo non adeo concinno. Processus enim ordo certus judicii est, non admittens extraordinarium quid, quod ordini huic contrariatur, atque nihil aliud involvit, quam id, quod ordine caret, aut inverso ordine tractatur, id quod naturæ processus plane repugnat: Convenientiora proinde erunt vocabula judicii ordinarii atque summarii, sive solennis & minus solennis, quibus & alii DD. utuntur, interque eos *Schulter. Ex. 13. th. 7. Brunnem. in Proc. c. 1. n. 16. Struv. & alii.**

§. 14. Dicitur vero judicium ordinarium illud, in quo pleno ac solenni ordine proceditur, & stylo cujusque fori consueto; summarium vero, in quo observatur modus procedendi compendiosior ac brevior, sufficiens tamen ad veritatem, quantum satis est, exquirendam. Utrumque hoc judicium, juxta hætenus deducta à Jure positivo dependet. Etsi enim processus substantialia ad Jus Naturæ & Gentium Interpretes passim referant, ut jamjam innuimus; Id tamen suo modo, & quoad ea solum procedit, quæ à processu sine vitio abesse nequeunt, adeoque etiam in Statu naturali, ad cognitionem causæ arbitris committendam, necessaria sunt, jus autem positivum ad processum summarium applicavit. Cæterum uti processum ordinarium debemus Curiae Romanæ & Juri Canonum; Ita eidem etiam acceptum ferimus processum summarium, quem in primis *Clemens 8. in c. Sape. 2. de V. S.* exposuit. Totum judicii ordi-

ordinarii processum paucis delineavit *Rosbach. in Proc. tit. 21.* atque
 rythmis Germanicis, politioem tamen hodierni temporis Poelin
 haud præ se ferentibus, expressit *Termin. in Proc. c. 2.* Ad eum re-
 gulariter pertinent omnes causæ, nisi vel ipso jure, vel utriusque
 partis consensu exceptæ sint, ut summarie tractentur, quod liti-
 gantibus perquam expedit, ut eo citius lites finiantur. *Lauterb. ad
 tit. ff. de Judic. tb. 10.* Etsi enim nonnulli DD. hanc processum or-
 dinarium immutandi potestatem partibus denegent, propterea,
 quod solennis judiciorum ordo sit Juris publici, cui per partes re-
 nunciari nequit, *arg. l. 38. ff. de Pact. vid. Marant. in Spec. P. 4.
 dist. 4. n. 13.* illorum tamen sententia non solum falsa, sed & non
 nisi ad protelationem litigiorum excogitata est, cum processus or-
 dinarius non favorem Reip. sed partium solum concernat, ut de-
 monstrant *Carpz. in Proc. tit. 1. art. 1. n. 59.* atque *Brunn. in Proc. Civ.
 c. 1. n. 18.* unde porro fluit, quod Principes & Status Imperii, ab-
 rogato hoc processu, summarium ejus loco surrogare possint, mo-
 do sufficiens causæ cognitio non excludatur. Vid. *Brunnem. c. 1.*
 Quæ vero causæ, propter singularem rationem, pro summarijs
 habeantur, enumerant Pragmatici passim, præcipue *Zang. de Exc.
 p. 1. c. 1. num. 66. seq. Carpz. p. 1. c. 2. def. 10. § in Proc. tit. 1. art. 1.
 n. 47.* ac *Jacob. Schultes. obs. 3. ubi 150.* refert, quas omnes *Brunnem.
 in Proc. c. 1. n. 21.* ad quatuor capita generalia recenset, dum Pro-
 cessum hunc summarium introductum esse docet, 1) ob salutem
 publicam, præsertim in causis tributorum & inquisitionis criminum,
 nec non in causis militum &c. 2) ob qualitatem & favorem perso-
 næ, & rei, Ecclesiæ sc. Viduarum, Mercatorum &c. 3) quia res non
 patitur moram, ut in alimentorum & sepulturæ causis &c. 4) ob par-
 vitatem præjudicii & facilitatem reparationis, quo respectu reme-
 dia possessoria summaria esse dicit, nec non processum Legis diffi-
 mari, in quibus omnibus tamen Judicis *Præsumptio* & arbitrio haud
 parum relictum esse dicit *Schilter. Ex. ad Pand. 13. tb. 7.* cum & in
 ordinario Processu lites *ex Zenon. Constit. iur. 12. C. de Jud.* compen-
 diose decidere teneatur, præsertim postquam nostra procedendi ra-
 tio Romanæ longe prolixior reddita est.

§. 15. Ob diversa ista Capita, ex quibus Processus summarius
 fluit, etiam diversas sortitur qualitates, ut differat & gradibus &
 specie. Et gradibus quidem, qui in exacta aut minus exacta con-
 sistent cognitione. Datur enim I.) Processus summarius sive minus
 solen-

solennis, sed cum causæ cognitione exacta, & sufficiente ad veritatem exquirendam, aliisque requisitis *Clem. 2. de V. S.* huncque Status Imperii, salva Justitia, ordinario processu abrogato, non solum per doctrinam *Brunnem. loc. cit.* introducere, sed & eodem in omnibus causis, tum exiguis, tum gravioribus, iudices inferiores meliori cum conscientia uti possunt, quam apicibus Processus, ut docet *Schilt. Ex. 13. tb. 8.* II.) Datur Processus summarius, minus quoque exactam causæ cognitionem continens, propterea quod pro scopo non habeat principalem causæ definitionem; sed præparatoriam tantum usque ad plenariam cognitionem, vel etiam informatoriam, ut iudex certus fiat de via processus ordinaria aperienda. Ex quibus gradibus oriuntur diversæ quoq; species Processus summarii, ad quarum priorem spectat processus inquisitorius, qui à iudice ex officio summaria quidem, exacta tamen causæ cognitione tractandus est; alteram constituit possessorius summarius, in quo præparatur via ad ordinarium possessorium in interdictis retinendæ possessionis. Quam distinctionem possessorii non sine rationibus impugnavit *Mindan. de Interd. Comm. 13. num. 24. & seq.* quem hæc in re variis adductis argumentis sequitur *Brun. in Proc. c. 1. n. 45. seq.* sed tamen quoad litigiosam possessionem, ob periculum armorum, in Immediatis Imperii per *Ordin. Camer. p. 2. t. 21. in fin.* probata, tandemque in omnibus de possessione litigantibus, utut in his periculo armorum facilius occurri possit, per Praxin recepta est. Tertia est, qua executio prompta ac parata intenditur, exindeque Processus Executivus appellatur, qui causæ cognitionem quidem minus solennem, sufficientem tamen, imo perfectam requirit, non partium perfectione, ut alias loqui solemus, sed graduum, quia non omnis generis exceptiones in eo admittuntur, sed ex tantummodo, quæ in continenti liquidæ sunt, cæteris ad reconventionis processum rejectis. Origo hujus processus non à Romanis, sed nostris potius dependet moribus, nec iis tamen vetustioribus, ubi major fides habebatur testibus, quam chartæ aut scripturæ, unde huic illi perpetuo fuerunt adhibiti, ut in casu litis emergentis produci possent, sed, postquam compendiosus Germanicorum iudiciorum processus, de quo jam antea, à Curie Pontificiæ procedendi ratione sublatus, imo consumtus, & litium immortalitas excogitata est, prudenti consilio in Germaniæ provinciis hæc summaria processus executivi forma recepta fuit, ut saltem in illis causis, quibus

quibus ex scriptura debitoris, æque ac ejus confessione, de debito liquet, vitilitigia evitentur, atque fides, utpote humanæ societatis vinculum, eo melius servetur.

§. 16. Præter has processus Summarii species nullas amplius moribus receptas aut probatas esse docemur. Cum tamen his, ut ex præfatione liquet, nonnulli Jcti, etiam celebratissimi, adjiciant Processum, quem vocant irregularem sive tumultuarium; Quare ordinis ratio postulat, ut eundem nunc quoque paulo pernitius intueamur.

SECTIO II.

De Processu irregulari sive tumultuario in specie.

SUMMARIA.

In §. 1. Autor hujus Processus ejusq. Suffragator nominatur. Significatio vocum regularis atq. irregularis etymologice evoluitur in §. 2. Quid Juridice significant, & quomodo Carpz. vis utatur, adducitur in §. 3. & 4. In mentem Carpzov. accuratius inquiritur, & Processus Irregularis Causa efficiens §. 5. Objeſtum §. 6. Forma §. 7. & Fines §. 8, proponuntur. Rationes, quibus illum impugnari Oldekop. referuntur §. 9. 10. & 11. Quæ sententia probanda, queritur in §. 12. An dari possit Processus Irregularis, tractatur in §. 13. ubi variis rationibus & aſſruitur & simul in §. 14. confirmatur. Mens porro Carpzov. resolvitur ac fusius explicatur §. 15. Oldekopii rationibus respondetur §. 16. tandemq. concluditur in §. 17.

§. 1.

Diversis Judiciorum ac Processuum divisionibus, quas in antecedentibus consideravimus, Saxonicoꝝ Jctorum Decus, Carpz. loco subinde allegat s. il. in Proc. tit. 1. art. 6. tandem superaddit & hanc, qua Judicium in Regulare & Irregulare distinguit, eamq; à nemine, qui processualia hæcenus tractavit, positam, observantia tamen fori ita comprobata esse credit, ut sicco haud prætereunda fuerit pede, qua in re suffragatorem invenit *Prædicum celeberrimum*, Job. Georg. Nicol. in Proc. p. 1. c. 1. n. 15. Sed enim cum peculiari modo vocabulo irregularis processus utatur, ante omnia termini erunt explicandi, ut eo magis appareat, quid de hac Carpzoviana divisione, quæ excellentissimis Jctis non parvam dissidiorum ansam præbuit, sentiendum sit.

§. 2. Et quidem verbum regulare à regula suam denominationem sortiri, in vulgus notum esse putamus. Est enim id, quod

secundum regulam fit. Utut autem verbum regulæ interdum accipiat pro instrumento, quo regimur in re scite agenda; interdum pro norma, qua lineæ diriguntur; interdum quoque pro brevi rerum præceptione, quæ definit, quid agendum vel faciendum sit, prout testatur *Martin. in Lexic. Philolog.* ut hac ratione etiam adjectivum ex regula deductum multipliciter recipiat significationem; In frequentiori tamen & potiori significatu regulare id indicat, quod regulæ est conveniens, ac cum ordinario alioquin convenit, ut testantur Lexicographi passim. Irregulare proinde id erit, quod regulæ non quadrat, sed ab eadem deflectit, vel deficienti, vel abundando, quando scil. desunt, quæ adesse regulariter debent, & adsunt, quæ regula non requirit: Regulare namque & irregulare aliquid dicitur non per se & absolute, sed respectu regulæ, ad quam exigitur, ita, ut, quicquid cum ista congruit, regulare, quicquid ab ea discrepat, irregulare vocetur, teste *Kulp. ad Monzamb. p. 2. c. 6. §. 13.* Regula vero vel dependet à Jure Naturæ & Gentium, vel à Jure positivo, & pro hujus diversitate dicitur etiam aliquid regulare & irregulare.

§. 3. Hancque significationem quoque supponit *Carpzov.* qui tamen pro regulari judicio habet non solum illud, in quo Judiciorum substantialia ac solennia deprehendere licet; sed etiam extraordinarium & summarium, in quo levato, quod ajunt, velo absque strepitu & figura judicii proceditur, quod suo quidem modo irregulare est, in eo tamen à *Carpzov.* pro regulari habetur, quod à regulis Juris quoad substantialia processus non deflectat, nec confuse ac tumultuarie tractetur, sed observatis potius substantialibus illis processibus, quæ tum Juris Naturæ & Gentium esse dicuntur, tum etiam à Jure positivo dependent, atque in anteced. Sect. ex Cl. Sæpe. 2. de V. S. deducta reperiuntur, ob quæ semper judicium summarium integrale quoddam esse dicit, suo constans initio, medio & fine, adeoque regula certa.

§. 4. Irregularem ergo Processum hunc vocat *Carpzov.* in quo etiam substantialia ista Processus summarii omissa inveniuntur, eumque hunc in modum describit, quod sit talis processus, qui nec ab actione certa incipit, nec omnes processus ac judicii articulos recipit, sed in certis quibusdam capitibus subsistit, vel, obiter ac tumultuarie tractatus, judicis cognitioni ac sententiæ submittitur. Quia vero in sua hac definitione tumultuariæ tractationis facit

men-

mentionem; Ideo eundem postea ipse tumultuarium nominat in *Proc. tit. 8. art. 5. num. 3.* quo nomine passim hodie insigniri cepit, atque subinde utitur *Oldekop. dec. 4. qu. fin. § dec. 5. qu. 1.* ut adeo Processus irregularis & tumultuarius synonymice pro uno eodemque habeatur, qua occasione brevissimis notandum, tumultum nihil aliud, quam perturbationem magnam, quæ ex hostili incurso aut populari seditione oritur, atque majus quid turba esse, de qua & quomodo à rixa differat, videri potest *Jetus Ulp. in l. 4. §. 1. § 2. ff. vi bon. rapt.* ubi insimul indicat, turbam appellari ex genere tumultus, quem Isidorus quasi timorem multum dictum esse censet. Plura de hoc vocabulo vid. apud *Lexicogr. § Cic. 8. Philipp.* unde tumultuarium omne illud dicitur, quod rapide fit, atque præperum est.

§. 5. Sicut autem ex definitione proposita apparet, quod *Carpzov.* hunc suum processum irregularem duplicem faciat, & primo quidem eum, qui, ratione objecti, in certis quibusdam capitibus subsistit, alterum vero ratione modi, qui obiter ac tumultuarie tractatus judicis decisioni submittitur; Ita Causam ejus efficientem non tam esse dicit Juris auctoritatem, quam potius æquitatem ac consuetudinem, cui asserto suffragari videtur, quod in *Seß. priori* de Germanis ex *Lebmann. Chron. Spir.* observavimus, eos, antequam operosus Juris Canonici processus invaluit, modo procedendi breviori, maximeque restricto usos fuisse, quem mores hodierni Germaniæ iterum probarunt in Executivo processu, ut saltem in iis causis, quibus debitoris confessio ex scriptura manifesta est, priscus Germanorum candor, sine longo litis sufflamine, suæ restituatur integritati; qua occasione facile quoque hic irregularis procedendi modus obtinere potuit, maxime cum litigantium paupertatem, & ut sumtibus parcatur, nec non periculum, quod subinde ex mora oritur, pro causa impulsiva habeat, aliasque explorati juris sit, litigantium pariter ac reipublicæ interesse, processum abbreviari litemque subito finiri, *l. 2. de Re Jud. § l. 10. C. de Transact.*

§. 6. Objectum hujus processus non solum in genere omnes illas causas esse credit *Carpzov.* quibus vel passus Juris dubii incidit, vel quæ nullam admittunt moram, vel etiam ubi litigantes sunt pauperes, ut compendiosam illarum tractationem ipsa svadeat æquitas sed etiam in specie causas calculationum, rationum reddendarum, concursus creditorum: prætereaque certa quædam capita, quibus,

vel contumacia subditorum quævis, vel etiam specialiter contumacia eorum, qui nobilibus servitia præstare recusant, multa pecuniaria aliq; pœna coercenda est, prout in *Proc. tit. 8. art. 5. n. 3. nec non num. 20. & seq.* demonstrat.

§. 7. Modum peragendi hoc judicium vel ipsa Ejusdem indicat denominatio, dum illud non solum irregulare, sed & tumultuarium vocatur. Quare *Carpzov.* eundem sequentibus indicat verbis: *Quod nec ab actione certa incipiat, sed in certis quibusdam capitibus subsistat, ac obiter & tumultuarie tractetur.* Quænam vero illa capita sint, id aliter non explicat, quam quod certa contumaciæ exempla referat, hoc processu puniendi, insimulq; judicibus veniam tribuat, qui in processu tumultuario, vel super quodam juris articulo, moram & protractionem omnem evitare cupiunt, sicque causam statim decidunt, ne, quod cito expediri potest, processui longinquo reservetur. Modum proinde tractandi hoc judicium, non tam legibus aut moribus præscriptum, quam potius arbitrio judicis relictum esse asserit, cui opinione hoc vel maxime suffragatur, quod in omni etiam ordinario processu judex teneatur compendiose lites tractare ac decidere, per *l. 12. C. de jud. jam antea allegat.*

§. 8. Finem, quem hic processus intendit, hætenus dicta sufficienter innuunt, quod scil. sit, ut causæ earumq; puncta, quæ hoc processu tractantur, sine strepitu judicii, de simplici & plano (liceat hac formula uti, qua alioquin Processum summarium peragi dicunt) decendantur & finiantur, hocq; modo sumtibus parcat, ac, litigantium & Reipublicæ bono, processus abbrevientur, nihilominus tamen Justitia recte administretur. Quapropter judicibus ignoscendum esse docet *Carpzov.* si non ordinem juris, Justitiam tamen observaverint, quod aliis verbis ita declarat: *Se quidem nolle defendere partes judicum, qui licentiam sibi sumunt processum quemvis ex suo dirigere cerebro, sed iis solum veniam polliceri, qui hoc processu causam statim decidunt.* Quapropter *Carpzovii* hac in re *Sectator Nicol. cit. c. 1. n. 15.* caute ac provide semper procedendum esse asserit, ne processus hic fiat mantellum injustitiæ, præcipue quando judex imperitus, aut casum pro amico animo volvens, aut immemor saluberrimi moniti *Imper. Justinian. in l. 14. v. si enim. C. de jud. repetiti in Sächf. Land-R. l. 3. art. 30. v. Der Richter soll.* licentiam sibi sumit, processum aut nimis violenter tractare, aut ex suo dirigere cerebro, hocque modo æquitatem fingere cerebrinam, nulla
Juris

Juris ratione suffultam, quod ipsum hodie, quam plurimi litigantium, maximo suo damno, sæpius experiuntur. Hæcque sunt, quæ de Processu irregulari tum formando, tum justificando, Ejusdem defensores adducunt.

§. 9. Sed sicut in aliis plerisque assertionibus, quæ duriora visa fuerunt, suum contradictorem in *Oldek.* persona nactus est *Carpz.* Ita quoque idem ipsi contigit circa hunc ipsum Processum irregularem sive tumultuarium. Eum namque *Oldek. in Quest. ad Proc. Crim. dec. 4. qu. ult. § dec. 5. qu. 1.* acerrime impugnat, variisque destruere conatur rationibus & argumentis, quæ sequentia potissimum complectuntur: (1) Quod inter diversas Judiciorum divisiones, quas *Wes. in Paratit. ff. de Jud. n. 8. Rosb. in Proc. t. 1. n. 4. Marant. in Spec. Siv. de Ordin. Jud. p. 4. Tholos. l. 47. Synt. c. 4. § seq.* aliique plures satis prolixè & copiose explicant, atque *XXII.* recensent, nullus unquam, ne verbum quidem proposuerit, quod novæ suæ, nec unquam auditæ divisioni ansam præbere potuerit *Carpzov.* quod & ipse ingenue fatetur, se neminem judicia ac processus ita distinguentem vidisse. Proinde cum novitas semper sit suspecta, teste *Wesensb. in Parat. ff. Quod quisque §.* quæ non aliter in jure constituendo considerari potest, quam si evidens ejusdem appareat utilitas, suadens, ut à jure, quod diu æquum visum est, recedatur, *l. 2. de Const. Princ. § c. 3. §. de Const. § Affin.* merito quoque hanc distinctionem, noviter excogitatam, non solum superfluum, sed etiam prorsus inutilem, imò justitiæ damnosam, & propterea improbandam esse dicit, perinde ut illa *Rob. Marant.* Practici celeberrimi, vi cujus judicium aliud validum, aliud invalidum esse voluit, in *Spec. P. 4. dist. 6. sub init.* & quidem ex causa paulo post allegata, quod, qui bene distinguit, bene doceat, ac è contrario recte dicatur, male distinguentem male docere, quod posterius *Oldekop.* (2) præcipue in hac distinctione usui venire videtur, quia irregulare judicium illis quoque requisitis substantialibus, quæ Jure Nat. & Gent. in quovis processu necessario adesse debent, destituitur, adeoque ob hanc causam reprobari debet. Est namque Jus Nat. immutabile, & quæcunque de eo aut Gentium Jure in litigiis ad Justitiæ administrationem exiguntur, ut sunt narratio facti, responsio, probatio, defensio, sententia, salva justitiâ omitti haud possunt, ne vel innocens reus condemnatur, vel etiam actor perdat causam justissimam. Perinde itaque *Oldek.* esse videtur, ac si *Carpz.* judicium divideret

in bonum & malum, justum & iniquum, validum & invalidum. Neque Ipsi suffragari dicit distinctionem *Marant.* antea adductam, cum in ea, æque ac *Carpz.* in hac sua distinctione, contra Logico-
rum regulas peccet. Membra enim divisionis à se invicem disjun-
cta & seposita, ita tamen comparata esse debent, ut cum toto con-
veniant, cum eoque reciprocari possint, alioquin evertunt natu-
ram divisi. Præterea (3) urget *Oldek. Carpzovium* voluisse proces-
sum substantialibus Juris N. & G. destitutum constituere, à quo
omne jus abhorret, cum ordinis neglectus ac præposteratio vitiet
actum & sententiam, c. 22. *de Rescr.* in quocunque processu, etiam
summario, maxime si sine legitima cognitione aut probatione lata
sit. *Rosbach. in Proc. l. 72. de Nullit. Sent. n. 25. & seqq.* Unde (4) pro-
no alveo fluere censet, quod processus irregularis sine lege, & ra-
tione, sub titulo & colore æquitatis fictæ, in Justitiæ perniciem ex-
cogitatus sit, cum tamen correctiones J.L. in omni interpretatione
vitandæ, nec jura, tot vigiliis composita, iterum pro placito In-
terpretum tollenda sint. Quamobrem prætenfam fori observan-
tiam seu praxin, quam *Carpzov.* pro ratione principali supponit,
nec se, nec alios unquam audivisse, & si alicubi docerum irrepperit,
eam, (5) tanquam irrationabilem & suspectam, rursus eliminan-
dam esse docet, dum vel ipse *Carpz.* haud diffiteatur, judices sæpius
hoc mantello errata sua tegere, nec ad rem facere putat, quod *Car-
pzov.* de Justitiæ observatione annectit; siquidem si Judices, tali
ordine tumultuarie procedendo, in non iniquam sed justam ali-
quando inciderint sententiam, id valde per accidens fieri & meri ca-
sus fortuiti esse, juxta notissimum illud veri verbum: *Ein blind
Mann findet auch bisweilen eine Erbse.*

§. 10. Ulterius (6) monstroso huic, uti id appellat, judicio,
vel ipsam judicii definitionem opponit, quod scil. sit legitima rei
controversiæ apud judicem tractatio, quæ irregularitati omni &
tumultuariæ tractandi rationi contrariatur, atque insanabilem
ejusdem nullitatem arguit, idque in tantum, ut ne consensu qui-
dem vel conventionem partium convalidari possit, hætenus scil. ut
valeat tanquam sententiæ, quamvis nihil obste, quo minus in vim
pacti & conventionis comprobari possit. *Ant. Gabr. l. 2. Concl. Com-
mun. tit. de Sent. concl. 2. n. 6.* Neque iterum (7) nullitatem hanc
sanare videtur, quod de Justitiæ observatione annectit *Carpz.* siqui-
dem judex jus & Justitiam tunc demum administrare censetur,
quan-

quando Juris ordine servato procedit, & litigatores causæ suæ merita explicantes patienter audit, *L. Judices. 6. cum Auth. seq. C. de Jud.* minime vero quando, ordine judiciario non servato, decernit, argumento eorum, quæ notat *Gloss. in L. Justa. ff. de Acquir. vel amitt. possess.* Periculum moræ ut evitetur & protractio litium, non statim (8) hunc tumultuarium procedendi modum salvare posse credit *Oldenk.* cum sub hoc prætextu imperitis judicibus, propriis etiam affectibus in quocunq; processu ad præcipitantiam inclinantibus, pejori exemplo calcar quasi addatur, atque faveatur præcipitantia, quæ tamen noverca Justitiæ & plena periculi res est. Non diffidetur quidem, quoties periculum ex mora extimescendum est, toties posse à regulis Juris communis recedi, per *l. 5. §. 11. de Nov. op. Nunc.* quin & partes contra naturam transactionis ad concordiam compelli, si vel timor subsit scandali, aut ne ad arma confugiant, aut si articulus controversus ita sit de apicibus juris, & adeo subtilis, ut, propter opiniones ex utraque parte militantes, causam potius componere, quam judicis cognitioni subicere expediat. *Card. Tusch. Lit. C. concl. 464. n. 8.* Non tamen tali casu mox novum, & quidem ejusmodi formandum esse censet judicium, in quo ne summaria quidem procedendi ratio invenitur: cum nullus plane processus, sive eum summarium, sive alio quocunque nomine indicare velimus (solo momentaneo propter periculum armorum excepto) salva Justitiæ & Juris Divini ac Nat. ratione, absque eorundem læsione contractius exerceri, & celerius expediri possit, ac eo modo, quem in notissima pariter ac in omnibus bene constitutis judiciis approbata *Clem. Sape. 2. de V. S.* salutariter præscriptum legimus. His addit (9) *Carpzovium* in excusando suo processu diversis quidem uti verbis, unum tamen idemq; proponere, imo id, quod improbat, excusare, quod prohibet, permittere, & quod permittit, prohibere; ut hac ratione non causæ cognitioni & decissioni legitima, sed casui potius pro amico locum relinquat, cum tamen sciamus, hos casus magis esse pro diabolo, teste *Thessaur. decis. 89. n. 3. §. dec. 206. n. 13.*

§. 11. Denique (10) ad exempla hujus judicii irregularis à *Carpzov.* adducta in *dec. 5. qu. 1.* ita respondet *Oldenkop.* quod prius, nempe mos à subditis multam per processum tumultuarium extorquendi, observantia fori, in qua se fundat, confirmari nequeat, cum rei non bonæ consuetudo nulli juri præscribat, etsi longissi-

mum

num intercefferit tempus. Melius itaq; fuisset, si *Carpzov.* malum istum morem, etiam à semetipso improbatum, potius exterminasset, quam sua autoritate comprobasset; Ratione posterioris autem exempli, scil. contumaciæ subditorum, Nobilibus servitia præstare renuentium, pro coloranda sua opinione citasse quidem, *Carpzov.* textus & DD., sed ad hunc casum & processum tumultuarium male applicatos; quin potius distinguendum esse: An subditi ad servitia indubitate sint obstricti, an non? ut illo casu nullo opus sit processu, sed operas debitas præstare recusantes, captis pignoribus, multa vel incarceratione, ad obedientiam, secundum locorum consuetudinem, adigi possint; hoc autem non per processum tumultuarium, sed potius per sufficientem causæ cognitionem, contra subditos recusantes procedendum sit, cum plures dentur casus, quibus Domini suos subditos ad operas non debitas, & insolitas compellere solent. Valde ergo miratur *Oldekop.* quid moverit *Carpzov.* potentioribus, contra quos ut plurimum militat præsumptio juris, & qui subinde susq; deq; habent, quid de servitiis subditorum jura statuunt, nova & suspecta sui tumultuarii processus arma sub Justitiæ prætextu, contra misellos rusticos subministrare, & ne verbulo quidem attingere, quomodo illis subveniendum sit. Hæc in synopsis quasi sunt, quæ operosius ad hunc Processum impugnandum *Oldekop.* adducit.

§. 12. Sane, quænam tandem in hoc controversiarum genere probanda sit sententia, non adeo in proclivi esse videtur, dum præxeos, præcipue Saxonica, peritissimus Interpretes *Carpzov.* est, pro quo, perinde ut pro aliis DD. de consuetudine testantibus, probabilis militat præsumptio, per doctrinam *Mascard. vol. 1. concl. 426. Bachov. ad Treutl. vol. 1. disp. 1. tb. 9. l. H.* cui non parum suffragatur, quod hujus sui judicii celerioris Justitiæ administrationem unicum constituat scopum: Contra vero tumultuaria ista procedendi ratio vel solo hoc nomine se suspectam reddit, ut taceamus, quod *Carpzov.* utatur verbis, partim ambiguis, partim etiam generalioribus, primo intuitu non satis indicantibus, an sub illa justam & necessariam cognitionem comprehendat, an vero eandem excludat, ut vel maxime propterea pro figmento haberi possit, juxta ipsum cordati J Cti, *Dn. Brunnemann.* effatum, qui in *Proc. Civ. n. 1. n. 23.* sequentibus utitur verbis: *Præmonendus autem est Lector: Nos non intelligere Processum tumultuarium, quem nonnulli sibi ipsis fin-*
gunt.

gunt. Quia tamen credendum vix est, optimo JCto Carpzorio eam excidisse, aut in mentem venisse sententiam, quæ rationi Naturali aut analogiæ Juris plane contrariatur; Ideo negotium illud adhuc paulo penitius considerabimus, præsertim cum non omnia, quæ ab Oldekop. adducta sunt argumenta, (quod tamen pace JCti hujus excellentissimi, cujus auctoritatem semper veneramur, dictum esse volumus) ita comparata esse videantur, ut nihil extet, quod ipsis reponi queat.

§. 13. Ne tamen in incerto vagemur, duabus totum id, quod controversum est, tractabimus quæstionibus, quarum prima est: *An Processus, qui compendiosior summario est, hocq; respectu irregularis vocari potest, detur & existat?* Altera vero: *An is, quem Carpzov. cit. loc. præscripsit, ac non solum irregularem, sed etiam subinde tumultuarium appellavit, sicq; his vocabulis synonymorum loco usus est, prout jam antea monuimus, pro tali sit habendus?* Prior quæstio se ipsam facile ex hac nostra Dissertatione resolvet. Demonstravimus enim in Sect. 1. §. 14. (1) utrumque Processum, ordinarium & summarium, à juris positivi determinatione dependere, de jure vero Naturali (2) nullum peculiarem in causis procedendi modum præscriptum extare, sed rationem solum naturalem exigere, ut sufficiens, pro cujusque negotii indole & natura, adhibeatur causæ cognitio, quæ tamen pro cujusque causæ qualitate variat, vid. supra Sect. 1. §. 16. ubi ostendimus, species diversas Processus summarii, & quod, secundum diversitatem objectorum atque finis differant, modoque exactam cognitionem requirant, modo in summaria ac breviori subsistant. Neque enim (3) diffiteri possumus, varia subinde occurrere negotia, quæ vel non opus habent exactiori cognitione, vel, etsi prolixiorem tractandi requirerent modum, tamen ob concurrentes circumstantias, compendiosiori cognosci & decidi debent via, inter quæ præcipue eminent causæ, specialiori nomine *disciplinæ* dictæ, quæ processu, ut plurimum simplici ac succinctiori, quam illo, quem alioquin causis summariis in *Clem. 2. de V. S.* præscriptum legimus, ne dicamus tumultuario, tractantur, quod illis, qui notitia rerum Academicarum pollent, haud ignotum esse potest. Utut vero in harum tractatione sæpius abusus intercedat, dum facta occurrentia magis festinanter ac obiter cognoscuntur; Attamen rerum Academicarum & Scholasticarum statum, non aliam, quam

compendiosam in causis his disciplinariis procedendi rationem permittere, certissimum est; cum & Jus Civ. velit, ut in tali casu Magistratus contra filium contumacem, ex arbitrio patris, procedat, atque eam dicat sententiam, quam pater dici voluerit, prout *l. 3. C. de Pot. Patr.* affatim monstrat.

§. 14. Diffidendum præterea haud est, quod (§) etiam ex illis, quæ ad Processum summarium DD. requirunt, unus vel alter actus nonnunquam sine vitio nullitatis omitti possit, maxime vero dilationum & terminorum à Jure vel statuto assignatorum spatium, juramentum calumniæ, & quandoque etiam citatio, si is, qui jam præsens est, cognitioni causæ se submittat, de quibus aliisque ad hanc omissionem spectantibus post DD. à se allegatos, videri potest *Zang. de Except. p. 1. c. 2. n. 4. & seq.* quid? quod, contra absentem quoque, ex capite contumaciæ, processum in causa, maxime post lit. contest. continuari, ac sententiam ferri posse, ex *l. 13. §. 2. C. de Jud. Ord. Camer. p. 3. tit. 43. §. 4. & Rec. Imp. noviss. de A. 1654. §. 2. Bûr. de nun. 36.* plusquam notissimum est. Accedit, quod (§) processus inordinatus, sive irregularis toleretur, ubi de meritis causæ jam constat, arg. *l. fin. §. fin. ff. quod met. caus. l. 1. §. 1. ff. quæ Sent. sine Appellat. Mevius p. 1. dec. 177. num. 5.* Ex quibus omnibus satis liquere putamus, quod non solum à Superiore, sed etiam à consuetudine Processus summarius coarctari, ac judici, præsertim inferiori, compendiosior procedendi ratio, vel permitti, vel ab eo peracta probari possit, modo sufficienti, pro qualitate negotii, cognitione non destituatur. Modus procedendi enim in causis summariis ita legibus ac moribus præscriptus non est, ut Judicis *Præsentia* & arbitrio nihil sit relictum, cum ipsi incumbat, etiam in ordinario processu lites compendiose & *συντόμως* decidere, juxta *l. 12. C. de Jud.* & monita *Schilter. Ex. ad ff. 13. tb. 7.* qui apposite & in terminis hætenus dicta comprobat, dum *cit. Ex. 13. tb. 3.* docet, quod non solum in causis exigui momenti, sed etiam in aliis gravioribus, judices inferiores tuto, & meliori cum conscientia, majorique cum laude, processu summario uti possint, quam solennibus istis dilationibus, Lit. contestationibus, probationibus, interlocutionibus, aliisque apicibus, de quibus aut Jus Canon. aut Recessus Imperii, aut Ordin. Provinc. disposuerunt, hocque moribus genuinis Germaniæ conveniens esse, in quorum præ-

præjudicium & perniciem ordinarius, qui vocatur processus, à *Wis-
siaz* Curia Papalis introductus fuit, quod & præ aliis *Conring. de
Jud. Reip. Germ.* evincit, neque habere dicit *Schilt.* alteram partem,
quod conqueratur, cum in secunda instantia penes Curias provin-
ciales, & alia superiora Judicia, processus ordinarius ipsis adhuc in-
teger maneat, tandem concludit: Se meminisse hoc ipsum in pluri-
bus provinciis & præfecturis, sicubi judicantium avaritia non præ-
valuit, feliciter observatum fuisse.

§. 15. Num vero *Carpzovii* processus irregularis, sive tumul-
tuarius, ad hanc ipsam compendiosiore tractandi viam referri
queat? id *posteriors est questionis*, circa quam, si *Oldekop.* sequa-
mur mentem, negativa omnino probanda esset, dum expresse asse-
rit, *Carpz.* nobis obtrudere processum, qui omnibus processus sub-
stantialibus, etiam illis, quæ Juris N. & G. esse dicuntur, adeoque le-
gitima causæ cognitione caret. Sed enim vero hoc *Carpzov.* nul-
libi asseruisse, verum eo ipso tantum duriores sibi attraxisse vide-
mus causam, quod, in describendo hoc processu, nonnunquam gene-
ralioribus utatur verbis. Attamen si ingenui verborum *Carpzov.*
interpretes esse velimus, inveniemus sane, quod minime ejusmodi
intelligat aut supponat processum, qui Juri N. & G. plane ad-
versatur, sed talem potius, quem jam descripsimus, quive idcirco,
quod compendiosior sit summario, irregularis vocari potest, hocq;
arguunt verba ipsius accuratius inspecta, atque idem bonæ inter-
pretationis regulæ exigunt, præcipue, si consideramus ea, quæ non
solum de æquitate, qua hunc processum æque ac consuetudine niti
docet, sed insimul quoque de objecto, quod vel passum juris dubii,
qui nullam admittit moram, vel paupertatem esse dicit, proponit.
vel maxime autem ea, quæ de ejus fine, scil. justitiæ citius ad-
ministranda, annexit, atque monet, cavendum esse, ne hoc mantello
judices errata sua tegant. Ex quibus omnibus apparet, nihil eum
de tali asseruisse ac statuisse Processu, qui Juri N. & G. repugnet,
idque vel unicus finis, administratio scil. justitiæ, evincit, quia de
materia practica hic agitur, in qua principium demonstrandi regu-
lariter petitur à fine, *Job. à Felde Dissert. de Interpr. Pat. §. 8.* quo
cognito, non facile latere poterunt media, cum & finis sit norma
mediorum, hæc vero in processu sunt ea, quæ substantialia ejus di-
cuntur, sive quæ pertinent ad sufficientem causæ cognitionem, qui

igitur vult finem, vult etiam media, quæ ad eundem sunt necessaria, quod in *Carpz.* processu observandum est. Neutiquam enim defendere vult iudices, qui hoc prætextu licentiam sibi sumunt, processum quemvis suo dirigere cerebro; sed illis solum veniam tribuit, qui, protractionem litium evitantes, causam cito decidunt, vel etiam, ob deficientem solidam juris cognitionem, aliter decidere non possunt. Ubi enim nec de actione, nec de processu formando constat iudici, eum vix aliter, quam ex æquo & bono, secundum iustitiam tamen, in materialibus decidere posse, ipse *Carpzov.* dicit, atque sub hac hypothefi processum hunc suum in dicasteriis & collegiis *JC*torum haud improbatum esse testatur. Quibus verbis idem innuit, quod jam antea ex *Schilt.* adduximus: Compendiosorem causas cognoscendi rationem in iudiciis inferioribus non tantum subinde occurrere, sed & ad Reip. felicitatem conducere. Huc pertinet, quod traditur passim à DD. Nullitates processus, in prima instantia commissas, in Curia suprema non esse attendendas, modo de meritis causæ & iustitia liqueat. Vid. *Ord. Cam. p. 3. tit. 38. §. 2. Mynsing. cent. 1. obs. 27. & passim Gail. l. 1. obs. 41. num. 1. Meichsner. tom. 3. dec. 18. n. 1. & dec. 19. n. 2.* quorsum spectat, quod iure Regio Hispanorum defectus solennium iudicium haud vitare dicat *Parlad. 2. Rer. quotid. c. 10. n. 1.* Quare exempla causarum, à *Carpz.* adductarum, suppositis his terminis habilibus, hujus processus obiectum constituere possunt.

§. 16. Quæ cum ita sint, nihil refraganturea, quæ ab *Oldekop.* contra hunc processum irregularem operosius deducta sunt. Ad (1) enim dubium facilis est responsio, quod nihil interfit, utrum divisio hæc iudicii apud alios Interpretes inveniatur, nec ne. Non enim omne, quod novum est, rejici debet, eo quod novum sit, neque à novo jure constituendo ad novam divisionem valet consequentia, sed sufficit, divisionem illam, ut demonstratum fuit, non repugnare analogiæ Juris, hinc negatur, eam esse inutilem & iustitiæ damnosam, ac propterea improbandam. Concedimus quidem, bene distinguentem bene docere, sed hic iterum distinguendum inter divisionem artis & usus, & quod usus, tanquam rerum Magister, sæpe aliquid confirmet, quod artium regulis non adeo convenit, ut ex variis divisionibus, ab Interpretibus Juris relatis, probari posset, nisi prolixitatem evitare vellemus. Qua propter non tam *Carpzov.* ipse


ipse ita processum distinguit, quam potius, observantia edoctus, usum
 fori ita distinguere tradit. Quod (2) irregulare hoc iudicium de-
 stituatur substantialibus Jur. N. & G. hoc est *Κερίσμα*, & in qua-
 stione, an unquam *Carpz.* tale supposuerit, id quod hactenus ex ejus-
 dem verbis negavimus, & quamvis contra Logicorum regulas pec-
 care dicatur, non peccavit tamen contra regulas, (si ita dicere fas
 est) usus, quod modo monuimus. Unde porro (3) *Oldekop.* du-
 bium se ipsum diluit, siquidem ex ipsis *Carpzov.* verbis monstra-
 vimus: illum ejusmodi processum, qui legitima causæ cognitione
 caret, nunquam intendisse, multo minus probasse. Eodem ictu ca-
 dit, (4) quod sine legis ratione sit excogitatus, nec non (5) quod
 consuetudo talis irrationabilis & suspecta sit eliminanda, neque (6)
Carpzov. obest definitio iudicii, cum & in hoc suo irregulari modo
 legitime procedat Iudex, non quidem ratione solennium, sed ra-
 tione causæ meritorum, quare improbari nequit, modo Justitiæ
 administrationem, (quam omnino intendit) pro fine habeat, de qua
 in (7) dubio agitur. Interim periculum, quod subest, atq; protractio
 litium noxia omnino hunc celeriores & compendiosiores tra-
 ctandi modum salvare potest, maxime si eò obtineamus idem,
 quod alias longiori processu consequimur. Unde quoque in cau-
 sis injuriarum iudex partes ad transactionem & remissionem sub-
 inde cogere potest, si ex ea idem actor consequatur, quod ex actio-
 ne instituta sperat, aut sperare unquam potest. *Mev. p. 1. dec. 224.*
num. 9. Quod igitur (9) idem, quod improbat, excuset, aut quod
 prohibet, permittat, id ex ejusdem verbis vix ac ne vix quidem pro-
 babitur, nec quod casibus pro amico locum relinquat. Denique
 (10) ad exempla ab *Oldekop.* impugnata respondemus: Nos jam
 antea indicasse, ea, suppositis terminis habilibus, intelligenda esse,
 neque etiam aliter intelligi posse, juxta ipsam mentem *Carpzov.*
 Quo circa cum privatum ac publice utile sit, quantocrys discedi à
 controversiis in quibusdam negotiis, (veluti in causis injuriarum,
 disciplinaribus & aliis) atque coerceri contumaciam litigantium ac
 subditorum, iudici quoque contra ordinem, nonnunquam ex causa
 quid statuere permissum erit, *arg. l. ult. ff. de Injur. ex qua Anton.*
Fab. lib. 9. Cod. t. 20. def. 10. recte infert, quod etiam actoris vin-
 dictæ cupiditatem coercere possit, quo respectu non omnis judi-
 cialis persecutio injuriæ semper vacare peccato dicitur, sed ea tan-

tum, quæ sit boni publici causa, absque libidine ulciscendi. Ziegl. ad
 Grot. l. 1. c. 2. §. 8. n. 7. & Grot. eod. n. 13.

§. 17. Ex quibus omnibus tandem satis abundeque liquere putamus, hunc Carpzovii Processum irregularem, sive tumultuarium, non omni plane destitui ratione, neque pro monstroso, injusto, inutili ac damnofo actu habendum esse, sed vel maxime aliquando, pro diversitate circumstantiarum, vel necessario vel utiliter adhiberi posse. Quare etiam laborem nostrum, ejus explicationi impensum, haud frustraneum esse speramus, B. Lectorem insimul rogitantes, ut hisce nostris Conatibus benigne

annuat. Interim

Soli DEO sit Gloria.



Sic Ciza doctum Te quoq; filium
 Nostras ad oras mittit, & optimis
 Coronidem solertem apud Nos
 Addere vult studiis, Amice.

Quas terra fruges Misnica severat,
 Has nostrum amcenô largifluas sinu
 Maturat arvum, copiæq;
 Ubere Tu metis ipse cornu.

Messem ecce! gratans ominor indies
 Optatiorem laudis adoream,
 Honoris in templô paratam,
 Multijugô meritam labore.

*Id quod Clarissimi DN. RESPONDENTIS
 ornamento dicabat*

CHRISTOPHORVS Sonntag/ D.

*Si quis & Baldi titulos anbelat
Et Viri docti elogium, huic necesse est,
Codices volvat sine fine doctus
Heluo plures.*

*Fluxus hic idem est tibi, Amice, limes :
Id quod in nostrâ Specimen cathedrâ
Editum firmat : nec enim fuisti
Codicis expertus.*

*Gratulor summo Tibi corde, posthac
Apprecans pulcræ Themidos brabeum :
Det Deus, possis Studiis beatam
tangere metam!*

Hisce Nobili atque præclare docto DN. HUTTERI,
suo hætenus Auditori ac Fautori, de præsentī
solidæ Eruditionis Specimine gratulari, atque,
ut id ipsum Suprema Themidos brabæa brevī
cum Deo excipiant, apprecari voluit

PRÆSES.

UT lites minuas & pressis jura ministros
Astrææ stabili junctus amicitia,
Hoc precor hoc voveo : pergas pertexere telam,
pergenti tribuet præmia summa Themis.

*Exigua hæc
Nobilissimo atq; Doctissimo
DN. HUTTERO, J. U. C.
Fautori, Amico & Commensali suo ut honoratissimo,
ita suavissimo, deproperabat*

JOHANN. MARTINVS Trechsel/
dictus Großtopff.

Dum

Dum parat hic Annus canens sibi fata suprema;
 Ingenii formam, sollicitamq; Tuam
 Hoc etiam in Studiis curam Tentamine monstras,
 Præmia sicq; Tibi digna suprema paras.
 Gratulor hūc Tuīs animosis ausibus, optans
 Mox caput ut doctum digna corona tegat.

Ita
 Volante calamo Clarissimo DN. RESPONENTI,
 Commensali & Amico suo honoratissimo,
 εὐλοφύχως gratulatur, ac prospera quæque
 vovet

JOHANNES MICHAEL FUNK,
 Med. Stud.

Si, sua labra rigat qui semper Palladis undis
 Ingentes titulos & nomina magna reportat;
 Nullus erit, qui quæso neget Tibi præmia laudum,
 Quæ merito vel jure Tibi debentur, Amice.

Ita
 Gratulabatur Nobilissimo DN. RESPONENTI,
 Consalino & Amico suo æstimatissimo,

MAGNUS PAULUS HARTMANN,
 LL. Stud.

